



Publicaziuns dalla vischnaunca, jamna 9

Votaziuns federalas dils 4 da mars 2018

L'urna principala en casa communal e aviarta sco suonda: **Dumengia, ils 4-3-2018, 9.00–11.00**

La documentaziun da votar duess mintga votant/a haver obteniu. Cass cuntrari san ins s'annunziar immediamein, denton **sil pli tard entochen venderdis, ils 2 da mars 2018, allas 17.00** tier l'administraziun communal (tel. 081 920 36 36).

Levgiament da votar

Mintga votant/a ha la pussevliadad da dar giu sia vusch a scret. En gliez mument sto el/ella observar il suandont:

1. Emplenir ora ils cedels da votar a maun e metter quels en la cuviarta da votar grischa e **serrar giu** ella.
2. Metter la cuviarta da votar grischa ensemen cun il certificat dil dretg da votar **suttascret** en la cuviarta alva, cun la quala Vus haveis obteniu la documentaziun da votaziun.
3. La cuviarta ch'ei adressada all'administraziun communal saveis Vus tarmetter cun posta (supplicau da francar) ni directamein fierer en la scaffa da brevs dalla casa communal.

Ils cedels da votar ston esser sil pli tard la dumengia, ils 4 da mars 2018 allas 11.00 tier l'administraziun communal.

Aschinavon ch'ei vegn buca risguardau sura instrucziuns da votar, ein ils cedels da votar nunvaleivels.

Suprastonza communal

Damonda da baghegiar

2018-1008.000

Datum dalla publicaziun: ils 2 da mars 2018

Il patrun: Vischnaunca Disentis/Mustér, Via Cons 2, 7180 Disentis/Mustér

Il representant: Eichenberger Revital SA, Rheinfelsstrasse 2, 7000 Chur

Object: Loipa Nordic Surselva, mesiras da construcziun en connex cun la traversada dil Rein (midada da projet), parcella 1891, Plaun Sut – Plaun Grond, 7180 Disentis/Mustér.

2018-1009.000

Datum dalla publicaziun: ils 2 da mars 2018

Il patrun: Linus Maissen, Via Foppas 10, 7186 Segnas

Il representant: Linus Maissen, Via Foppas 10, 7186 Segnas

Object: Sanaziun dalla casa, parcella 383, Via Foppas 10, 7186 Segnas

2018-1009.000

Datum dalla publicaziun: ils 2 da mars 2018

Il patrun: Vischnaunca Disentis/Mustér, Via Cons 2, 7180 Disentis/Mustér

Il representant: Biro d'inschignier Iso Mazzetta, Via Lucmagn 7, 7180 Disentis/Mustér

Object: Canalisaziun d'aua schubra nova a Crusch, sanaziun e renovaziun dallas lingias da canalisaziun a 7183 Mumpé Medel

- Ils plans da construcziun ein deponi tier l'administraziun communal.
- L'envesta publica cuoza 20 dis dapi il datum dalla publicaziun.
- Eventualas protestas encunter sura damonda da baghegiar ein d'inoltrar a scret enteifer 20 dis all'istanza da baghegiar, caum postal 57, 7180 Disentis/Mustér. La protesta sto esser motivada e suttascretta dil recurrent ni da siu representant.

Disentis/Mustér, ils 20 da fevrer 2018

Uffeci da baghegiar Disentis/Mustér



Cussegl da vischnaunca

Rapport dalla seduta dils 23-2-2018

En sia seduta dils 23 da fevrer 2018 ha il cussegl da vischnaunca sut il tgamun d'Armin Manetsch tractau pilras fatschentas. La lescha federala pil provediment d'electricitad metta peisa silla trasparenza dils cuosts en connex cul provediment d'electricitad. Igl artechel 12 dalla lescha scriva avon che las taxas per prestaziuns publicas ston vegnir indicadas separadamein sils quens dils consuments finals. Sils quens d'energia dalla Repower AG vegn quella taxa publica mussada ora separadamein. Las taxas per prestaziuns publicas ch'ils consuments finals pagan alla communitad (vischnaunca) ston sereferir sin ina basa legala. Ord quei motiv eis ei vegniu elavurau ina lescha sin palancau communal. Il cussegl ha approbau unanimamein la lescha davart l'indemnisaziun dallas prestaziuns dalla vischnaunca Disentis/Mustér en connex cul provediment d'electricitad.

Tier in exercezi da pumpiers la fin d'uost 2017 disdescha la pumpa d'in auto-cistiarna. Cheutras sa il vehichel buca vegnir duvraus per tschitschar aua d'in lag ni flum, ed era l'attacca sperta, decisiva ellas empremas minutas tier in barschament funcziunescha buca pli. Ina revisiun cumpleta da quella pumpa, aschilunsch ch'ei dat aunc tocca, custass ca. 40 000 francs. Il vehichel ha 34 onns ed era vegnius cumpraus 2007 sco occasiun a caschun dalla fusiun dils pumpiers Sursassiala. Schibein igl expert dalla firma responsabla per la reparatura sco era igl inspectur cantunal da pumpiers han discussegliau da far investiziuns el vehichel. Sper ils gronds donns dalla pumpa dat ei numnadamein aunc ulteriurs donns. Ils davos tschun onns han ils pumpiers investau rodund 14 500 francs vid reparaturas da quei vehichel. Per haver alla fin ina sligaziun optimala per la segirtad da stizzar en Sursassiala, han ils pumpiers analisau ensemen cugl inspectur cantunal la situaziun dil parc da maschinas ed elaborau ils proxims pass sin fundament dil concept da maschinas digl onn 2008. Sin fundament da quell'analisa drova ei in agir tier ils autos-cistiarna e tier il camiun ABC. Ord motivs da segirtad ed en vesta dallas experientschas fatgas el cantun vegnan dus dils treis vehichels remplazzai cun maschinas novas. Quellas han puspei da far lur survetsch per minimum ils proxims 25 onns.

La segirada da baghetgs (GVG) sustegn e propona suandont proceder:

- remplazzament dil camiun ABC. Tut ils cuosts da ca. frs. 300 000.– surpren la GVG.
- remplazzament auto-cistiarna: la GVG sustegn la cumpra d'in auto-cistiarna «Grischun». Il tetg da cuosts munta a frs. 450 000.–. L'investiziun ei necessaria e la GVG ha dau il consentiment per l'investiziun. La contribuziun dalla GVG munta a 27,5%. Pils pumpiers Sursassiala resta ina summa d'investiziun da frs. 326 246.40, inclusiv taglia sin plivaleta.

La repartiziun vesa ora sco suonda (repartiziun en pertschien approximativ tenor la clav dalla GVG):

Mustér	54,25 %	frs. 176 988.65
Tujetsch	35,95 %	frs. 117 285.60
Medel	9,80 %	frs. 31 972.15
100.00	%	frs. 326 246.40

Il cussegl da vischnaunca conceda unanimamein in credit da frs 177 000.– vid la part communal per la cumpra d'in auto-cistiarna pils pumpiers Sursassiala. El medem mument decida il cussegl unanimamein d'incaricar la suprastonza communal da contactar las vischnauncas vischinontas e surluvrar ils statuts pils pumpiers Sursassiala.

Plinavon pren la suprastonza communal posiziun tier ils dus postulats:

- Scaffir novas plazzas el subcenter Disentis/Mustér
- Instrarad ina discussiun sur dallas estructuras politicas



Il 16-11-2017 han cusseglier Wendelin Jacomet e nov ulteriurs commembers dil cussegl da vischnaunca inoltrau in postulat davart realisar in project d'ina rundella ed in sutpassadi per procurar la segirtad dil traffic d'autos, pedunzs e velocipedists ad Acla da Fontauna. Il cussegl communal decida unanimamein da surdar il postulat alla suprastonza communal.

Suprastonza communal

Referendum facultativ

A caschun da sia seduta dils 23 da fevrer 2018 ha il cussegl da vischnaunca approbau unanimamein la lescha davart l'indemnisaziun dallas prestaziuns dalla vischnaunca Disentis/Mustér en connex cul provediment d'electricitad.

Conform ad art. 21, lit. b dalla constituziun communal ei quella decisiun suttamessas al referendum facultativ. Il messadi tier sura fatschenta sco era la lescha ein exponi per envesta en casa communal (stanza nr. 10). Enteifer 20 dis dapi la publicaziun officiala han 80 votants la pussevividad d'inoltrar enviers sura conclus il referendu e pretender ina votaziun dil pievel.

Suprastonza communal

Exposiziun da cooperaziun

Revisiun parziala dalla planisaziun locala

En applicaziun digl art. 13 dall'ordinaziun cantunala davart la planisaziun dil territori per il cantun Grischun (OPTGR) ha liug l'exposiziun publica da cooperaziun per ina revisiun parziala dalla planisaziun locala dalla vischnaunca da Disentis/Mustér.

Object:

- Revisiun parziala Pignola
- Lescha communal davart habitaziuns secundaras
- Adattaziun dallas zonas d'utilisaziun a Sax/Sontga Catrina

Acts d'exposiziun: Pignola

- Plan da zonas 1:2000 Pignola
- Plan general d'avertura 1:2000 Pignola
- Revisiun parziala dalla lescha da baghegiar
Lescha davart habitaziuns secundaras
- Lescha nova davart habitaziuns secundaras
Adattaziun dallas zonas d'utilisaziun a Sax
- Plan da zonas 1:2000 Acletta/Funs

Basa: Rapport da planisaziun e cooperaziun Pignola

Rapport da planisaziun e cooperaziun lescha davart habitaziuns secundaras
Rapport da planisaziun cooperaziun Acletta/Funs

Temps da publicaziun: 30 dis naven dils 2 da mars entochen ils 2 d'avrel 2018

Liug e temps da publicaziun:

Casa communal (stanza nr. 10), Via Cons 2, 7180 Disentis/Mustér durant las uras da spurtegl



Propostas motivadas per midar ni completar ils mieds da planisaziun ein da far a scret entochen ils 2 d'avrel 2018 (datum bul postal) alla suprastonza communal, Via Cons 2, 7180 Disentis/Mustér.

Disentis/Mustér, ils 27 da fevrer 2018
Suprastonza communal Disentis/Mustér

Dretg da burgheis en connex cun fusiuns da vischnauncas

Informaziun

Il dretg da burgheis en vischnauncas fusiunadas sedrezza tenor la nova vischnaunca politica. Cheutras sa il dretg da burgheis semidar tier las persunas pertuccadas. Naven dil schaner 2018 han talas persunas la pussivladad ed il dretg da schar enscriber el register dil stadi civil il num da lur anteriura vischnaunca burgheisa en parantesa davos il niev dretg da burgheis. Quell'inscripziun cumpara el passaport sco era sin la carta d'identitad. Persunas cul dretg da burgheis da vischnauncas fusiunadas avon ils 1-1-2018 han d'inoltrar la damonda entochen ils 31-12-2020. La damonda a scret ei da tarmetter agl uffeci civil dalla vischnaunca burgheisa cul formular official ch'ei accessibels sin la pagina d'internet digl uffeci da migraziun e da dretg civil dil Grischun (www.afm.gr.ch sut la sparta survetschs).

En cass da novas fusiuns sto la damonda vegnir inoltrada sil pli tard treis onns suenter che la fusiun ei entrata en vigur.

Las taxas per la procedura muntan a 75 francs per ina persuna singula e 10 francs per mintg'ulteriura persuna cumpigliada.

Per ulteriuras informaziuns stat l'administraziun communal sco era igl uffeci da migraziun e da dretg civil dil Grischun bugen a Vossa disposiziun.

Administrazin communal

Clom d'urgenza 118

Preziadas vischinas, preziai vischins

Onn per onn dat ei cass en nies cantun nua ch'ils pumpiers vegnan clamai memia tard sil plaz da seracass.

Savens emprovan habitontas e habitonts da cuntionscher pumpiers ch'els enconuschan via telefon privat.

Il temps che va aschia a piarder ha ils davos dus onns caschunau la veta a duas persunas el Grischun! Pli-

navon daventan ils donns cun mintga minuta spiarsa pli gronds. Perquei s'adressein nus a Vus cun ina fer-

venta supplica: clamei ils pumpiers mo sur il clom d'urgenza 118. Era sche Vus veis mo in pign problem sa il

polizist che pren encunter Vies telefon reagir aschia che mo ina pintga gruppa d'agid ni singulas persunas

vegnan clamadas. Ulteriuras informaziuns era davart la prevenziun anfleis Vus sin nossa pagina d'internet:

www.pumpiers-sursassiala.ch.

Engraziel per Vies sustegn!

Vos pumpiers Sursassiala

Uniun ludoteca Disentis/Mustér e contuorn

Invitaziun alla 20avla radunonza generala dall'uniun ludoteca Disentis/Mustér e contuorn.

La radunonza ha liug ils **7 da mars 2018** allas 19.00 en ludoteca a Mustér

Tractandas

1. Beinvegna

2. Elecziun d'in/a dumbravuschs



3. Protocol dalla 19avla radunonza generala dils 3 da fevrer 2017
4. Rapport dalla presidenta
5. a) Rapport dalla cassiera
b) Rapport dils revisurs da quen
6. Elecziun d'in/a nov/a president/a
7. Novs/-as conlucers/-as
8. Plan da lavur
9. Varia

Secziun da catschadurs Péz Alpetta

Preavis Lotto, sonda, ils 28-4-2018 meina la Secziun da catschadurs Péz Alpetta atras igl usitau lotto ella Sala Fontauna a Mustér. Nus supplichein autras uniuns da risguardar quei datum. Bien engraziament.

La suprastonza

Cinema Salaplauna

Stallkino: «Paddington» (UK 2014)

Mittwoch, 7. März, Filmstart 16 Uhr Center sursilvan d'agricultura, Disentis/Mustér

Film: «Paddington». Den Paddington-Bär kennt wohl jeder. Ein knuffiger, lustiger Zeitgenosse aus Peru, der in London ein neues Leben anfängt und mit der Familie Brown beste Freunde findet. «Paddington» ist ein extrem gut getrickster, höchst charmanter Film, der für Zuschauer jedes Alters etwas zu bieten hat. Wir zeigen ihn für die Kinder in der deutschen Version.
Eintritt frei, Kollekte.

Invitaziun Seniors-Ca

Gievgia, ils 8 da mars 2018 dallas 13.45–16.00 en Puntreis. 500 onns reformaziun – referat da sur Giusep Venzin.

Meisa da miezdi organisada da Seniors-Ca e PUNTREIS

Entschatta: allas 12.15 en PUNTREIS

Gentar cun treis tratgas inclusiv 3 dl aua dalla spina ed in caffè. Annunzia entochen allas 9.00 dil di a PUNTREIS, tel. 081 929 56 56. La meisa da miezdi ei aviarta per mintgin/a.

Post d'informaziun Seniors-Ca

Uniun samaritana Mustér

Nies proxim exercezi meinsil (IVR) ha liug gliendisdis, ils 5 da mars 2018 allas 19.30 en casa da scola, Cons. Tgi che ha interess e marveglias da fuffergnar inaga tier nus ei envidaus cordialmein tier quei exercezi. Sperond sin stedia participaziun salida

la menadra tecnic



Uniun da gymnastica UGM

Invitaziun alla radunonza generala, venderdis, ils 9 da mars 2018 allas 20.00 el «Hotel Alpsu». Suentar la radunonza vegn offeriu l'usitada tscheina.

La suprastonza

Corporaziun d'alp Nalps e Tegia miez, Segnas

Radunonza generala dils dretgs d'Alp Nalps e Tegia miez, mardis, ils 13 da mars 2018 allas 20.15 ell'ustria «Cresta» a Segnas. Tractandas ordinarias. A stedia participaziun envida

la suprastonza

Acziun da spender saung

L'acziun da spender saung per donaturas e donaturs dallas vischnaucas da Medel e Mustér ha liug **gliendis, ils 12 da mars 2018** dallas 18.00–20.00 en halla Cons. Nus engraziein grondamein per quei bien survetsch en favur da malsauns e disgraziai e sperein sin ina stedia participaziun.

Uniun samaritana Mustér

Radunonza generala club da tennis Mustér

Sonda, ils 10 da mars 2018 allas 19.00 el «Café la Centrala», Mustér.

Gliesta da tractandas:

1. Beinvegni
 2. Elecziun dumbravuschs
 3. Protocol dalla radunonza generala dils 18 da mars 2017
 4. Rapports
 - President
 - Interclub
 - Meinaturnier
 - Juniors
 5. Quen 2017 e rapport dils revisurs
 6. Contribuziuns annualas
 7. Budget 2018
 8. Elecziuns
 - actuar
 - cassier
 - cau da juniors
 - in/a revisur/a da quen
 9. Program da stad
 10. Varia
- Cordialmein envida

Suprastonza club da tennis Mustér